

**МОЛЕБНОЕ ПЕНИЕ  
О ПРАВОСЛАВНЫХ ХРИСТИАНЕХ,  
ВО УЗАХ ТЕМНИЧНЫХ ПРЕБЫВАЮЩИХ**

Благословен Бог наш...  
Царю Небесный...  
Бог Господь...

**Тропарь, глас 2.**

Манассию от уз и горькаго заточения, / молитв ради свободивый  
Всещедрый Боже, / и рабы Твоя в покаянии Тя призывающих и молящихся, /  
от уз и заточения свободы, / и от всякаго злаго обстояния избави, // яко Един  
Человеколюбец.

Слава: Правило веры и образ кротости...(Тропарь Святителю  
Николаю)

И ныне: Милосердия двери отверзи нам...

**Запевы – повторяются три раза:**

Слава Тебе, Боже наш, слава Тебе.  
Пресвятая Богородица, спаси нас.  
Святителю отче Николае, моли Бога о нас.  
Слава, и ныне.

Избави от бед и скорбей раб Твоих, Владыко Всемиловитиве, / яко мы  
усердно к Тебе прибегаем, // Милостивому Избавителю, всех Владыце,  
Господу Иисусу.

Спаси от беды рабы Твоя, Богородице, / яко мы усердно к Тебе  
прибегаем, // яко к Нерушимей Стене и Предстательству.

Моли Бога о нас, святителю отче Николае...

**Прокимен, глас 7.**

Изведи из темницы душу мою, / исповедатися Имени Твоему.

**Стих:** Вонми молитве моей, яко смирихся зело.

**Евангелие от Иоанна (глава 8, стихи 31-36):**

«Рече Господь к веровавшим Ему иудеом: аще вы пребудете во словеси  
Моем, воистину ученицы Мои будете. И уразумеете истину, и истина  
свободит вы. Отвещаша и реша Ему: семя Авраамле есмы, и никомуже  
работахом николиже: како Ты глаголеши, яко свободни будете; отвеща им  
Иисус: аминь, аминь глаголю вам, яко всяк творяй грех, раб есть греха. Раб  
же не пребывает в дому во век: сын пребывает во век. Аще убо Сын вы  
свободит, воистину свободни будете».

**Кондак, глас 5-й.**

Яко милосердия источник, / и благочестия пучина, Христе Боже, / не презри в скорбех и бедах, Тя верою призывающих, / но яко Щедр помилуй, / и во узах от всякаго зла сохрани, // да поем Ти: аллилуия.

### **Запевы – повторяются три раза**

Не имамы инья помощи...

**Сугубая ектения:** Помилуй нас, Боже...

**После прошения «О Патриарсе и властех...» приложи и сия:**

– Еще молимся Господу Богу нашему о еже посетити милостию Своею в темницах пребывающих, греховными узами связанных, во еже оставити зломыслие греховное, и в покаянии обрести надежду и освобождение, Христом и Спасителем нашим даруемое, прилежно молимся, Господи, услыши и милостивно помилуй.

– О еже просветити умы и сердца во узилищах сидящих светом благодати Своея, во еже отложить всякое намерение греховное, и работу греховным навыкам упразднити, последовати же повелениям Твоим, прилежно молим Тя, Господи, услыши и помилуй.

– Исцеляя болезни, врачую страсти, посети благостию Твоею в темнице сидящих, сохраняя их от всякаго недуга и немощи, от духа злобы и уныния, плотскаго сластолюбия и пьянства, да во всякой целости обрящут путь, угодный Тебе, Истинному Богу нашему, прилежно молимся услыши и яко Щедр, помилуй.

**Услыши ны Боже...**

Господу помолимся;

Господи, помилуй.

**Молитва о заключенных**

Господи, Иисусе Христе, Боже наш, Крестом во ад сошедый, диавола посрамивый, заклепы и вратницы адовы разрушивый, узники свободивый и жизнь миру Твоему даровавый, призри на молитву смиренных и недостойных раб Твоих, ко Твоему Величеству бесприкладному и бездне человеколюбия прибегающих и яко Благосерд Твоею милостию и щедротами посети грехми обремененныя и в заключении темничном сущия: Ты бо рекл еси, Господи, яко хотением не хочу смерти грешника, но еже обратится и живу быти ему. Услыши в скорби и тесноте душевной призывающих Тя: в немощи находящихся душевныя и телесныя раны уврачуй; в ожесточении сердечном сущия к покаянию обрати; правды и оправданий Твоих ищущих в вере и творении заповедей утверди и на путь спасения настави. Ты бо еси, Господи, помощь беспомощным, надеждо ненадежным, спасение отчаянным, всем вся буди и приведи ко пристанищу хотения Твоего. Да поем и славим Тя со Безначальным Твоим Отцем, и Пресвятым и Благим и Животворящим Твоим Духом ныне, и присно и во веки веков. Аминь.

### **Молитва ко Святителю и Чудотворцу Николаю**

О всесвятый Николае, угодниче преизрядный Господень, теплый наш заступниче, и везде в скорбех скорый помощниче! Помози нам грешным и унылым в настоящем сем житии, умоли Господа Бога даровати нам оставление всех грехов наших, елика согрешихом от юности нашея, во всем житии нашем, делом, словом, помышлением и всеми нашими чувствы; и во исходе душ наших помози нам окаянным, умоли Господа Бога, всея твари Содетеля, избавити нас воздушных мытарств и вечного мучения: да всегда прославляем Отца и Сына и Святаго Духа, и Твое милостивное предстательство, ныне и присно и во веки веков. Аминь.

**Отпуст.**